

Powšitkowne WOZJEWJENJA

njedźelu, 1. apryla 2018

Časowy přehlad křižerskich procesionow

Dokładny přehlad časow křižerskich procesionow kaž tež čara, po kotrejž na tampuću a dompuću pojedhaja, je na internetowej stronje www.posol.de a tam pod „Časy křižerskich procesionow“ podaty. Přehlad je serbsce a němsce zestajany. Pod samsnej internetowej adresu su pokiwy nastupajo zawěšćenje křižerjow podate. Tute su tam tež w němskej rěči wozjewjene.

Emmauske pućowanje lětsa w Salowje

Wšitcy serbscy młodostni su tež lětsa na Emmauske pućowanje přeprošeni – a to jutrowny štwórtk, 5. apryla, do Sulšec. Pućowanje zahaji so we 18 hodž. we wjesnej kapałce.

Spominanje na Jurja Delenka

Składnostnje 100. posmjertnin duchowneho a redaktora Katolskeho Posoła Jurja Delenka budže so srjedu, 11. apryla, na njeho w Baćonju spominać. Započatk je w 19.30 hodž. z Božej mšu. Po tym přeprošujetej Towarstwo Cyrila a Metoda z.t. a Baćońska wosada wšitkich na faru.

Serb dóstanje diakonsku swjećiznu

Biskop Heinrich Timmerevers wudźěli sobotu, 21. apryla, w 10 hodž. na Božej mši w Drježdžanskej katedrali Pětrej Mrózej z Kulowa diakonsku swjećiznu. Wšitcy wěriwi su na tutu Božu mšu přeprošeni a měli so za njeho kaž tež powšitkownje wo duchowny dorost modlić.

Na měrowy swjedzeń do Wostrowca!

Přećiwo prawicarskemu zetkanju we Wostrowcu k Hitlerowym narodninam napominaja nimo cyrkwe mnohe zwjazki, zo bychy so wot pjatka do njedzele, 20. do 22. apryla, w městačku nad Nysu na měrowym swjedženju wobdźělili. Towarstwo Cyrila a Metoda z.t. (TCM) je na swojej hłownej zhromadźiznje 19. měrca, w Ralbicach na nastork deкана Wita Sćapana wobzamknyło, zo tutón měrowy swjedzeń podpěruje. „Njeh so mnozy wobdźěla. Z mnohimi druhimi zwuraznimy z tym, zo smy přećiwo rasizmej a ekstremizmej a zo zasadžamy so jako křesćenjo za tolerantnosć a za měr, we Wostrowcu runje tež na hraničy k Pólskej, kotraž je pod němskim nacionalsocializmom bojaznje ćerpjeć dyrbjala“, praji předsyda TCM Jurij Špitank. Wón je po dorěčenju ze zarjadowarjami we Wostrowcu za sobotu, 21. apryla, bus skazał. Tón wotjědže w 10.10 hodž. z Radworja a pojedže na Ralbicy (10.30 hodž.), Chrósćicy (10.40 hodž.) a Budyšin (11.00 hodž.) do Wostrowca. Wottam pojedže wón wokoło 17.30 hodž. wróćo. Zajimcy měli so w redakciji Katolskeho Posoła přizjewić, telefonowe čisło (0 35 91) 550 212. Wobšěrny program měroweho swjedženja we Wostrowcu je pod www.posol.de wozjewjeny. Mjez druhim su w klóštrje Marijnym dole dny wotewrjenych duri.